

FONO OT FRATER

NUMER BI, LUNABI 2023 (2)

O antropolektur,

Abe lingua internasion kreat multi. Bitri ot ilis es kones e usa per antrop multi komple. Sed abe je lingua fakto omone, na es kones ne, akas ilis es rare tele. Frater es lingua rare, sed dis signifi ne, ili es ben plusne. Ili es lingua tauma, inergoes je ben plus linguamulti fakto omone. Ide tekniben ot androkreat Pham Xuan Thai es pas pro usa surtuta logomulti ot lingualatin e linguagres (sed natur omone es je usa), akas antropmulti bio in parti omone ot geo inergo konesre signifi ot logomulti tak. Logomulti na es ot tem longa in linguamulti omone. Sed balor ot Frater es tak, na teknigraf ot lingua dis es omo teknigraf in bitri lingua Asia, pro tipi, linguasina, linguabietnam o linguamalai. Faktouni ot bi balor dis kreat pas lingua bine. Mis optima na, antrop plus eureka futur Frater.

Filomulti ot Lingua Sistemfrater



Peri usa ot logo “tak”

Si nis lektur testumulti graf in biblo sefal, nis inergo eureka logo “je” usa temmulti, sed signifi ot ili es bitri. Surtuta, temkia ili es graf poste berba, signifi ili es temmulti omo “tak”. Benkia estrem ot mis es usa Frater omo mutane inergo, mis nesesa fakto berita bitri fisa mikro. Donide es, usa “tak” omo “so/thus”, si ili es poste berba. Per logo omone, let “tak” es jurtuta “so/thus”. Tipi: “**Ili logo pas tak**” (*said so*). Logo “je” signifi futur “also/too” bine. Mis logo prona: **Ili logo pas je**”. (*spoke too*). Peri usa ot logo “je” mis graf pas in numer ante (in Lunauni).

“Tri frater” (parti bi), logo per Bi Frater Grimm

Androfaktokoberpod ipo fakto pas na pro ipomulti ot roi, e ide pas: “Stof dis es fisa, dom es pro ni”. Androrasekapilabuka rase pas andromulti klasleban bine, e ide pas omo. Androbata sabre resepe pas batal multi, sed ili gardiforse pas omoin dentimulti, e pasine ne pas, akaus ili ide pas: “Si ni fob batalmulti, ni resepe futur temnul dom”. Temkia tem fisa pas pas, ilis aribere pas a pater; sed ilis kones pas ne, per medisin kak eureka kas ben plasuni pro esibit tekniben ot ilis, kursi pas omoin e donide pas uni a omone. Espekne, ilis obserba pas lepus kuren dia agri. “Optik, ili aribe omo deman,” androrase logo pas, pris pas basinmikro e sapon ot ili, spumi ili sura lepus telene pas, poste, intem kuren ot lepus, ili spumi pas ili e rase pas kapilabuka ot ili: ili trauma pas ne ili, ne kaus pas pato. “Mi filo na,” pater logo pas, “si bi frater ot ni es ne tekniben plus, dom es futur pro ni.” Poste sekun, uni andro pas pas belo in bagonipo. “Ni optik futur temdis, o pater, mi kones kia,” androfaktokoberpod ipo logo pas, kuren pas a bagonipo, prisforseeks pas kuadri koberpod ot ipo, e stoffisa pas kuadri neo. “Brabo,” pater logo pas, “ni es ne tekniben plusne frater ni; mi kones ne, mi obliga don dom a infan kia.”



Peri lokal bel “Sa Pa”

Kones ni, na in Bietnam, na es geonasion ot androkreat ot Frater, abe lokal bel tele a parti antefas plasuni ot geonasion na? Temkia antrop ide peri Bietnam, antrop desinsiko lokal kalor tele. Na es berita, akaus in geonasion komple telenetuta abe kalormaga forse. Sed lokal antefas plasuni, nam ot na es Sa Pa, abe monta multi. In sesonkuadri antrop inergo je abe alegro in aktoski. Temna abe ne kalor a plas na, e surtuta in noktu kalor katarakta sura deka o deka plusne degre. Urban sefal ot lokal na abe dommulti bel tele. Urban na es ide omo urbansefal sesonkuadri. Monta leban plasuni es Fansipan, ili abe 3,147 metri. Es presenben pro bisit parti antefas ot Bietnam pro optik plas frigo plus kon karakter omone multine.

* * *

Numer sekuen ot jurnal dis espresen futur in Lunatri.

Let Frater bio longa.